

陶雲汀先生奏疏

奏疏卷四十一目錄

江督稿

安化陶

請對調鎮江揚州知府摺子

各關米船免稅請展緩停止摺片

奏請接署江蘇藩司員缺摺子

校閱江北各營伍情形摺子

擬裁各標營兵數目摺子

捐賑餘存銀兩請發典生息摺子

押送噶咭喇夷船出境摺子

總兵出缺請

旨簡放摺子

學政出缺請

旨簡放摺子

請調劑快丁疲困摺子

覆奏嚴禁書肆小本文策摺片

江蘇裁汰文職閒員摺子

陞署知縣請暫緩送部摺片

安徽裁汰閒員摺子

請將延玩知縣得賄典史革職提審摺子

洪湖水勢蘇松等屬禾苗情形摺片

請對調鎮江揚州知府摺子

奏爲酌量地方情形請將現任知府對調以資治理仰祈

聖鑒事竊照知府有表率吏民之責必須因時酌量使人地各得其宜始與公事實有裨益茲臣等查揚州府知府黃在厚老成穩實服官江省最久上年因調署松江府篆務尙未回任適揚州猝被水災情形較重原署知府恩齡措置未能裕如經臣陶澍會同前陞撫臣程祖洛將揚州府一缺

奏調鎮江府知府王青蓮接署在案臣等查該署守王青蓮卓練精明勤於民事上年督同各州縣及委員查災放賑經畫有方現在賑務雖已竣事而外出流民初歸旋定安集尤資熟手辦理且揚州近當整頓漕務一切堵私緝匪更爲喫緊該署守接辦幾及一年頗有成效未便換人若卽以之調補斯缺更可收指臂之助其所遺鎮江府員缺亦係衝繁要地兼有督辦徒陽運河及查催空重漕船事宜必需幹員經理查本任揚州府知府黃在厚歷次調署江寧松江

常州各府事竝護理江安糧道均無貽誤應請
卽以該員調補鎮江府知府一轉移閒人地皆
宜臣等酌量現在情形不敢因以繁調繁拘泥
成例致涉遷就據藩臬各司會詳請

奏前來相應專摺奏懇

皇上天恩俯准將王青蓮調補揚州府知府所遺鎮
江府知府員缺卽以黃在厚調補期於兩府公
事均有裨益如蒙

俞允該員等均係現任知府請調知府毋庸送部引
見合竝聲明臣等謹合詞恭摺具

奏伏乞

皇上聖明訓示謹

奏

道光十二年五月二十五日具

奏六月二十八日奉到

硃批另有旨欽此同日奉到六月十一日內閣奉

上諭陶澍等奏請對調知府一摺著照所請江蘇揚
州府知府員缺准其以王青蓮調補所遺鎮江府
知府員缺卽以黃在厚對調該部知道欽此

各關米船免稅請展緩停止摺片

再上年江蘇被災各州縣糧價增昂前經奏准
凡米船運赴災區者照例免輸關稅以廣招徠
當卽行知淮揚許墅等關遵照遇有客販過關
米麥船隻查係運往災區售賣者概免徵稅在
案惟查道光三年因災奏免米稅係於四年五
月開徵上年蘇省被水成災既重且廣臣等陸
續委員赴山東河南等省採買糧食此時尙未
全行運到二麥亦尙未一律登場是以各屬現
在所報糧價猶未能遽就平減臣等體察情形

似應將米麥豆船免稅期限稍爲寬展俾資接濟俟二麥全收後糧價稍平臣等卽隨時奏明停止再行知照各關照常開徵以裕課稅理合附片陳明謹

奏

道光十二年五月二十五日附

奏六月二十八日奉到

硃批轉行照辦欽此

奏請接署江蘇藩司員缺摺子

蘇撫會稿

奏爲江蘇藩司員缺請以現署之員接署仰祈
聖鑒事竊准吏部咨開五月二十五日欽奉

上諭梁章鉅奏因病陳請開缺一摺梁章鉅著俟林
則徐到任後再行開缺回籍調理所遺蘇州布政
使員缺著陶澍林則徐揀員奏署欽此查藩司梁
章鉅先奉

諭旨護理江蘇巡撫經臣陶澍會同陞任撫臣程祖
洛奏委臬司額騰伊署理藩篆在案該司自署
篆以來辦理一切公事均屬認真今梁章鉅因

病奏蒙

恩准回籍調理所有江蘇藩司員缺應請仍令額騰
伊接署以資熟手除檄飭遵照外臣等謹合詞
恭摺具

奏伏乞

皇上聖鑒謹

奏

道光十二年六月初十日具

奏七月十三日奉到

硃批覽欽此

校閱江北各營伍情形摺子

奏爲查閱江北漕標河標暨各營伍情形恭摺具
奏仰祈

聖鑒事竊查道光十年輪應查閱營伍曾經前督臣
將河標中右廟灣佃湖及督標中左江寧左右

浦口溧陽青山瓜洲等營分別閱看

臣蒙

聖恩補授兩江總督適值籌辦鹽務河工兼以三省
同被水災賑務紛繁未及較閱各營今年春間
武闡事竣卽查閱省標四營併調看浦口溧陽
等營官兵技藝業經具

奏在案嗣至清江會同河臣漕臣籌辦重運卽前

赴海州查閱海州官兵調取東海營合看迨幫
船灌塘事竣復調集河標中營及附近之廟灣
佃湖二營官弁兵丁至清江合看旋自浦起程
至淮安府城查閱漕標中左右淮安四營並酌
調鹽城營官弁兵丁至淮合看行抵泰州查閱
泰州營併酌調狼山鎮標中左右掘港泰興等
營官弁兵丁至泰州合看行至揚州查閱揚州
併調看三江京口右奇兵青山瓜洲等營官弁
兵丁渡江至鎮江查閱鎮江營併調看高資營

官弁兵丁順道回省惟河標右營官兵正植催
漕尙未事竣現委河標中軍副將秦攀萼俟漕
竣前往代閱又徐州鎮標中城守蕭營宿州營
距浦寫遠未能調閱卽經照會壽春鎮總兵官
湯占先就近代閱均俟造冊送查至日再行辦
理所有按閱各營馬步弓箭鳥鎗併合操配隊
大小陣式步伐均屬整齊連環鎗砲俱能聯貫
施放三疊鎗亦齊截合法籐牌刀矛雜技挑舞
擊刺皆爲奮迅捷便鳥鎗準頭牽算在六七成
以上馬步箭中靶在七八成不等且多有全行

中靶者臣將技藝較優及緝捕著勞各官弁兵
丁當場分別記名獎賞存記其技藝稍次者分
別降補勒限練習各官弁內尙無衰劣不堪供
職之員委驗各該營軍火器械等項俱屬完整
適用馬匹亦臚壯足額統計各營以狼山鎮標
中左右泰州鎮江京右等營爲優海州東海漕
標中左鹽城廟灣掘港泰興揚州高資瓜州青
山三江等營次之河標中側湖奇兵淮安等營
又次之臣仍諄飭該管將備勤加訓練務使官
兵技藝一律精熟以仰副

聖主脩明武備之至意所有查閱江北漕河各標等
營官兵技藝情形理合恭摺具

奏伏乞

皇上聖鑒謹

奏

道光十二年六月十二日具

奏七月十一日奉到

硃批知道了欽此

擬裁各標營兵數目摺子

奏爲遵

旨查明各標營兵額擬裁數目節省經費仰祈

聖鑒事竊臣承准軍機大臣字寄欽奉

上諭前據長齡等奏籌辦回疆善後事宜請將各省
綠營兵額各按馬步守兵分別均勻於百名內暫
裁二名將裁缺所截經費解交甘肅藩庫自道光
十二年爲始歸入回疆經費項下搭運前往以資
支發當交該部查明具奏茲據奏各直省地方險
易異宜兵數多寡不一且額兵有在城分汛之別

在城者以備差操爲數稍多分汛者以專戍守人數較少自應由各省查明覈辦着各該省督撫各按全省兵數以每百名暫裁二名覈計共裁馬步守兵若干名於所屬標營內詳察繁簡多寡情形遇有拔補開革事故所出之缺應陸續分別扣除及所裁餉銀糧折馬乾併紅白卹賞銀兩應酌定裁減數目一併迅速查明各行據實覆奏將此各諭令知之欽此遵

旨寄信到臣當卽移會渭河撫提諸臣併通飭各藩司移行鎮協標營一體欽遵詳查去後茲先後

接准咨覆併據各藩司查議前來臣查江蘇省各標營額兵三萬八千八百八十三名按百名裁二名計應裁兵七百七十七名內有各營額兵尾數畸零不及應裁之數計短裁兵四名實計裁扣馬步戰守兵丁七百七十三名覈計所裁兵數連閏節省餉乾米折共銀一萬二千七百三十五兩一錢三分七釐五毫本色米二千二百九十五石一斗五升又紅白賞卹減裁銀四百二十八兩安徽省各標營額兵九千六百九十五名共裁馬步戰守兵一百九十三名每

年計節省餉乾米折共銀三千一百四十五兩
八錢三分本色米五百二十石二斗江西有額
兵一萬二千八百一十八名應裁兵二百五十
六名每年節省餉乾銀三千九百九十三兩六
錢米九百二十一石六斗紅白賞卹銀減裁四
百八十兩查江蘇安徽江西三省所裁兵米共
三千七百三十六石九斗五升請照道光元年
裁兵之案經前督臣孫玉庭

奏明每石照例價合銀一兩計銀三千七百三十
六兩九錢五分統計裁兵一千二百二十二名

內馬兵一百五名步兵二百三十九名守兵八百七十八名節省餉乾糧折賞卹及米石變價共銀二萬四千五百一十九兩五錢一分七釐五毫至各營應裁兵丁節省餉乾等銀均從道光十二年爲始其未經裁定以前各兵應支銀米請於各藩司建曠並截存款內動支如存曠不敷卽於坐落各州縣先行墊給另於新賦米內歸還其支過銀米兩款統俟裁竣之日歸入奏銷案內銷筭分別專案

題咨其安徽省應減紅白卹賞銀兩未經酌定

臣

現已飭催該藩司查議酌定另行咨部查照併
飭各藩司將裁存馬匹軍械等項照例辦理除
將送到各營裁減馬步守兵名數及節省銀米
賞卹數目清冊送部查覈外臣謹會同漕臣蘇
成額河臣張井江蘇撫臣林則徐安徽撫臣鄧
廷楨江西撫臣周之琦江蘇提督臣王應鳳合
詞恭摺具

奏伏乞

皇上聖鑒訓示謹

奏

道光十二年六月十二日具

奏七月十一日奉到

硃批兵部知道欽此

捐賑餘存銀兩請發典生息摺子

奏爲省城義賑餘存各款援案發典酌減子息以備荒歉而資久遠仰祈

聖鑒事據江寧紳士陳燦勲章沅梅曾亮伍長華陳克寬沈琮端木焯汪度等呈稱江寧城中向有義賑生息銀兩起於嘉慶十九年民捐民辦曾經

奏明有案上年城中被水十淹七八水不退者三月有餘仰沐

皇恩賑卹兼施採買平糶城中紳富倍形感動踴躍

輸將紳士等挨查城廂貧戶十三萬餘口放賑
三次加以散給貧生撥補鄉區施衣煮粥掩骼
救生丸餅當牛各務兼舉除費用外尙有餘剩
請將此項餘銀及嘉慶十九年道光六年義賑
餘存本息一併照案

奏請發典生息以爲城廂備荒之用毋許他項挪
移如遇災年需用卽令紳士將此息銀酌量覈
提或糶米或煮粥作爲義賑益錢文尙可冒領
或非貧戶而爭就米粥者必無富民辦理尤歸
切實惟查嘉慶十九年捐餘發典銀兩係長年

一分息上生息入少出多典商力有難支艱於承領應請改爲長年一分生息不令息上生息以免偏累又道光六年辦理資送流民曾提出銀六千兩另案生息今查流民無多仍請歸入原款一併生息等情當飭藩司查詳去後茲據江寧藩司趙盛奎飭府查明上年省城捐輸義賑共捐銀十二萬五千一百五十一兩六錢四分除支用外餘銀六千八百四十二兩七錢七分二釐加以嘉慶十九年原存本銀二萬兩又截至道光十一年夏季止共存息銀九千八百

三十二兩五錢六分二釐又上年秋季起至本年春季止共存息銀三千二兩九錢五分四釐六毫又道光六年收養流民提用銀六千二百五十八兩三錢七分九釐今應於收養流民生息本銀內照數歸還統計共銀四萬五千九百三十六兩六錢六分七釐六毫既據紳士陳請一併發交省城各典生息自應准其所請改爲長年一分生息不令息上生息以資久遠每年所生息銀仍存各典年終典商會同紳士當面註賬具結稟府轉報備查永爲城廂救荒之用

不准別項公事挪移倘有典鋪報歇將所存本息銀兩照數交出接開之典照案生息如無接開之典卽行攤派各典分領營運免致缺息之虞等情前來臣查地方偶遇災荒好義紳耆捐輸周濟係屬任卹之情江寧省城向因城廂例不給賑捐貲散放兼拯流離歷由民辦上年捐辦尤多茲據呈稱捐項尙有餘銀請同前存息本一併發典長年一分生息以備將來之用併請嗣後遇有應需或粥或米毋須散放錢文自因城廂人稠地雜窮約難分與鄉圖之確有田

廬戶口可查者不同故散錢不如米粥俾免濫
冒而歸實濟至從前發典息上取息蓋因本少
急於圖利其實此項賑餘多係典商所捐以所
捐最多之本卽償所捐極重之息利未著而累
己形旣非獎勸之道况相權無己之息卽爲相
權無己之本本旣虛而息豈實更非儲備之宜
現在存本稍裕取息自可稍減長年一分實昭
平允典商無可藉口自更感發天良保全善舉
併經藩司飭府議定董司經管章程不許地方
州縣因他項挪移動用請

旨永遠遵行於以保富安貧用副

聖主軫念民艱有備無患之至意除省城捐賑紳民
俟各屬捐冊彙齊一併照例請獎外所有江寧
城內捐賑餘存銀兩發典生息緣由

臣謹會同

江蘇巡撫

臣

林則徐專摺具

奏伏乞

皇上聖鑒謹

奏

道光十二年六月二十日具

奏七月二十一日奉到

硃批另有旨欽此七月十五日承准

軍機大臣字寄七月初七日奉

上諭陶澍奏省城義賑餘存各款援案發典酌減子
息以備荒歉一摺江寧省城上年紳士捐輸義賑
銀兩併歷屆義賑原存本息銀兩除支用外共銀
四萬五千九百三十兩零據該紳士等呈請一併
發交省城各典長年一分生息不令息上生息以
資久遠每年所生息銀仍存各典年終典商會同
紳士當面註賬具結稟府轉報備查永爲城廂救
荒之用著照所請辦理併著該督等嚴飭地方州

縣不許因他項挪移動用永遠遵行將此各諭令
知之欽此

押送暎咭喇夷船出境摺子

蘇撫
會稿

奏爲查明暎咭喇國夷船業已押送出境併知會
前途挨次押令南回以符定例恭摺覆

奏仰祈

聖鑒事承准軍機大臣字寄道光十二年六月初九
日奉

上諭富呢揚阿奏暎咭喇國夷船由閩至浙欲赴寧
波海關銷貨當飭驅逐開行等語暎咭喇國夷船
向不准其赴閩浙貿易今值南風司令竟敢乘便
駛入內洋希圖獲利自不可稍任更張致違定例

雖經該省驅逐出境難保其不此逐彼竄著琦善
陶澍訥爾經額林則徐嚴飭所屬巡防將弁認真
稽查倘該夷船攔入內洋立即驅逐出境斷不可
任其就地銷貨併嚴禁內地奸民及不肖將弁等
圖利交接務使弊絕風清以肅洋政等因欽此查
前項夷船臣陶澍於清江回省途次接據蘇松
鎮總兵關天培松太道吳其泰等稟稱該夷有
大船一隻約有七八十人小船一隻約二十餘
人因被閩浙兩省驅逐於五月二十二日乘風
駛入江南羊山洋面停泊經前護撫臣梁章鉅

奏明在案

臣

思夷性狡詐貪圖貿易顯違定例兼

恐內地奸民乘機勾串別滋事端不可不嚴爲
防範現當南風司令若竟任其放洋不卽設法
截阻一經驅逐勢必乘風而北由山東逕抵天
津又添往返臣陶澍比卽飭委常鎮道王瑞徵
馳往吳淞海口會同該管鎮道密派巡洋舟師
三面迎住使之不得近岸兼斷其駛北之路一
面整頓兵威嚴禁沿海小船毋許接近夷船以
防暗地銷售夷貨併令海營多備巡船押護至
浙省交替俾令挨次由閩折回粵省臣林則徐

赴任過鎮會晤商及驅逐所見相同初八日抵任江蘇復加劄飛飭速辦卽據該鎮道等報稱曉諭該夷人等以

天朝禁令祇准在廣東貿易其餘各省皆不准買賣令其作速回帆該夷自閩浙而至江南未能抵岸未免心存希冀比見蘇松鎮船隻排列海上地方兵役嚴查小船不准攏近該夷性本多疑時刻扒上桅杆瞭望見沿海一帶塘岸布列官兵頗露惶懼該船有胡夏米甲利畧通漢語卽向巡船聲稱伊等並非匪人因想求交易而來

今蒙曉諭伊等已經悔悟不敢再求買賣現值風狂雨大實在不能開船只求俟風色稍轉卽速開船回去等語迨六月十一日晚間風色稍轉西南卽促令開行該夷船不敢逗遛卽起碇開帆向東南折戩而去蘇松鎮總兵關天培親自督押另飭遊擊林明瑞押赴浙江交界以便交替護送該鎮現報於十二日申刻押護出境入浙江洋面該夷船前在江洋因風暫泊甚屬安靜並未進口滋事內地民人亦無與夷船私相交易之事臣等現已飛咨前途一體派列巡

船押護南行俾令由浙至閩回返粵東以免此
逐彼竄上副

聖主肅清洋政至意再該夷船乘風寄泊羊山洋面
該營弁失於防範旋即并力堵截不惟進口此
時押送出境辦理尙爲妥速應請免其開叅除
咨會浙江福建接替押送外臣等謹會同江南
提督臣王應鳳恭摺具

奏伏乞

皇上聖鑒謹

奏

再該夷船此次在吳淞口外寄碇旬餘懇求交易詞甚恭順惟據稱因廣東洋行交易不公是以前來等情臣等復密加訪察聞得上年廣東因暎咭喇商人爭佔馬頭將其驅逐胡夏米等卽係被逐之人不敢回國來此游奕如果屬實是該夷船旣爲廣東所逐又畏罪不敢遽回本國往來洋面終非了局臣等現經咨會廣東查明胡夏米等根底就近知照該國將其撤回庶免續後又有竄入合併附片具陳謹

奏

附錄卷之四十一
道光十二年六月二十日具

奏七月二十一日奉到

硃批另有旨欽此七月十五日奉准

軍機大臣字寄七月初七日奉

上諭陶澍等奏喚咭喇國夷船業已押送出境一摺
據稱該夷有大船一隻約有七八十人小船一隻
約二十餘人因被閩浙兩省驅逐於五月二十二
日乘風駛入江南羊山洋面停泊經該督等飭委
巡洋舟師三面迎住使之不得近岸兼斷其北駛
之路並令巡船押護至浙省交替俾挨次由閩折

同粵省該夷船有胡夏米甲利畧通漢語求俟風色稍轉卽開船回去迨六月十一日晚間風轉西南卽促令開行旋起旋開帆向東南折戩而去並派蘇松鎮總兵關天培等押赴浙江交界該鎮現戢於十二日申刻押護出境入浙江洋面仍飛咨前途一體派列巡船押護南行是該夷船自必由浙至閩至粵乃本月初二日據訥爾經額奏登州鎮總兵周志林咨稱六月十八日劉公島洋面有夷船一隻乘風駛至詢係前在江蘇等省被逐之船等語陶澍等既奏稱將該夷船押護南行不任

北駛何以復竄入山東境界著陶澍等詳查據實具奏將此各諭令知之欽此

總兵出缺請

旨簡放摺子

奏爲總兵出缺循例由驛奏

聞請

旨簡放仰祈

聖鑒事

臣

於七月初十日接據護理徐州道王廷彥

稟稱徐州鎮總兵裴安邦於夏間染患病症醫

藥罔效茲于七月初四日出缺伊子及孫俱未

在署現經護道督同銅沛同知等妥爲料理等

情前來

臣

查裴安邦係浙江武進士由藍翎侍

衛當差期滿以營守備揀發來江游歷今職自
壽春鎮調補徐州到任五載有餘勇幹有爲潔
清自勵於操防巡緝尤屬不遺餘力匪徒聞風
知儆地方藉資救戢實係閫帥內不可多得之
員所遺鎮篆界連東豫皖省五方雜處彈壓巡
防最關緊要查有江寧城守副將惠普恩歷練
勤能經臣保薦堪勝總兵堪以委令馳往接署
除檄飭遵照外所有徐州鎮總兵員缺應請

旨迅賜簡放以重地方謹會同南河總督臣張井循

例由驛恭摺馳

奏伏乞

皇上聖鑒謹

奏

道光十二年七月十一日由驛具

奏七月二十八日奉到

硃批另有旨欽此同日奉到七月二十日內閣奉
上諭江南徐州鎮總兵員缺著惠普恩補授欽此

學政出缺請

旨簡放摺子

奏爲安徽學政因病出缺照例暫行兼管闕防辦理錄遺事件由驛馳

奏請

旨簡放仰祈

聖鑒事竊照安徽學政鄂本順額因本年補行辛卯

正科鄉試時屆錄遺於七月十三日酉刻抵江

寧省城

臣

往迎晤見其委頓不能出轎言語恍

惚狀似中暑當卽延醫診治十四日黎明

臣復

往視業已不能言語神氣昏迷詢其隨行家人
知於月初感受暑熱服藥未愈因試期緊迫力
疾登舟適值風日燥烈卽晚抵岸病勢更加沉
重灌以湯藥竟不能入氣喘痰壅延至已刻出
缺臣查該學政持躬端謹品粹學優考試公明
士林翕服現在隨行惟有舊僕一人所有身後
一切臣已督同在省各官妥爲料理併知會皖
省一體照料惟鄉試在卽錄送遺才刻不能緩
查例載學政遇事故督撫署理印務倘遇鄉試
之年場期已近准其錄送遺才等語現查安徽

巡撫相距旣遙蘇撫辦理監臨亦尙未來省惟
有江蘇學政在省科試似可兼署但亦值按棚
錄遺且隔省人多務雜吏案搬移諸多未便臣
謹卽照例暫行兼署趕辦錄遺事件計皖省錄
遺士子向因考棚偏仄分爲八九日或十餘日
不等現已期促應卽連棚併考月底可以蒞事
臣職司較繁勢難兼顧一俟錄送諸生入場臣
卽委員齎印送交安徽巡撫署理所有安徽學
政應請

旨迅賜簡放以重考試謹循例由驛具

奏伏乞

皇上聖鑒謹

奏

道光十二年七月十五日具

奏八月初三日奉到

硃批另有旨欽此同日奉到七月二十四日內閣奉
上諭安徽學政著沈維鐫去欽此

請調劑快丁疲困摺子

奏爲天長縣快丁疲困追徵運費維艱援案籌捐
生息以資調劑仰祈

聖鑒事竊查江安糧道所轄各州縣快丁自倉運以
來因不諳駕運先經

奏准捐貼運造二費委伍代運及至道光三五六
等年節據江寧江浦上元全椒等縣各快丁因
積累成疲懇請調劑由丁民公捐或按糧捐輸
銀兩發典生息以抵運造二費均經前督臣等
奏蒙

恩准又因天長縣快丁貧疲造費無資道光三年經

前督臣孫玉庭

奏請於江興二衛加造餘息項下撥銀協濟免徵
在案其應徵運費需項較多一時未能籌濟茲
據天長縣詳稱該縣額派船四十隻除曹瀛一
船已於江浦等縣餘息撥銀調劑其餘三十九
船內載本奇等七船自行捐種隨船贍運仍該
船三十二隻內捐貼一百兩快船七隻捐貼一
百三十兩快船二十三隻每年共需運費銀二
千九百九十兩又待僉船二隻預爲籌備每年

運費銀二百六十兩通共每年需銀三千九百五十兩據該縣快丁張公和等通盤籌議各按田產儘力捐輸共得銀二萬三千七百三十兩此外均係極疲之丁委難再行勸捐懇請於江寧江浦二縣還款項下借銀一萬兩同丁捐銀兩湊足發典按月一分生息所得息銀以抵歲需運費及歸還庫款等情由縣轉詳前來當經臣等批令糧道確數議詳去後今據江安督糧道周繼圻會同安徽布政使佟景文查議詳覆前來臣查上元江寧江浦全椒等縣快丁貧疲

均以捐息免僉其江寧江浦二縣捐不足數會經

奏蒙

恩准於道庫減存項下借款湊足分別發典生息以抵運造二費免其僉運欽遵辦理在案茲天長縣地處偏僻災歉頻年丁力極疲其熟田可以完公者無幾餘俱肩挑貿易雇佃謀生一奉僉丁追貼官有例議之嚴丁受血比之慘仍屬無濟於公查該縣額僉快船四十隻內除快丁曹瀛一船已撥銀調劑其餘三十九船內戴本奇

張公和張公朋曹兼山陳國璽陳蔚然陸大琛等七船現據每船捐種四十石共計種二百八十石永遠隨船應運毋庸查辦仍有船三十二隻內捐貼一百兩快船七隻每年應需運費銀七百兩又捐貼一百三十兩並自運快船二十三隻每船應需運費銀一百三十兩每年共需運費銀二千九百九十兩又待僉船二隻預爲籌備每年共需運費銀二百六十兩通共每年應需運費銀三千九百五十兩除待僉船二隻現在尙未查僉毋庸撥給計現在應需運費船

三十隻歲需銀三千六百九十兩按九二折實庫紋銀三千三百九十四兩八錢據各丁公同湊捐銀二萬三千七百三十兩由縣查明此外均係極疲之丁委難勸捐請於江寧江浦還款項下借銀一萬兩同丁捐發交寧國府泗州轉發所屬各典按月計閏一分生息每年可得息紋銀四千一百八十二兩五錢二分除歲需運費銀三千三百九十四兩八錢按數撥給外仍餘銀七百八十七兩七錢二分卽以之儘還庫款十年共可提還銀七千八百七十七兩二錢

十年之後於原本內提銀二千一百二十二兩八錢如數歸還庫款竝無虧短其快丁自捐本銀仍照案交典生息永爲該丁等運費之用如此辦理毋須另爲比追丁民皆可相安官無經徵之累丁無缺運之虞且覈與調劑江寧等縣籌議發典生息及分年提還原本之案相符而各疲快又可藉以抒困洵於漕務大有裨益所有丁捐銀兩現據繳存道庫銀一萬兩其餘銀一萬三千七百三十兩俟本年十一月內催繳先行出具依限完繳切結不致遲誤似應准其

仿照辦理且所請借款本係從前

奏准調劑江寧江浦二縣快丁之銀今以之調劑
天長快丁事同一例與別項借款不同合無仰
懇

聖恩俯准在於寧浦二縣還款項下借撥銀一萬兩
同各丁現繳銀一萬兩先行由道飭發寧國府
泗州所屬各典領運生息俾早得一日之息卽
可早甦一日之累各快子子孫孫永沐

皇仁無旣如蒙

允准另飭司道議立章程同捐種清冊俟捐項繳清

後一併咨部備覈臣謹會同漕運總督蘇成
額安徽巡撫臣鄧廷楨合詞恭摺具

奏伏乞

皇上聖鑒訓示謹

奏

道光十二年七月二十日具

奏八月二十三日奉到

硃批另有旨欽此同日奉到八月初七日內閣奉

上諭陶澍奏調劑天長縣快丁疲困一摺據奏江安
糧道所轄天長縣丁力疲困僉運維艱請援案籌

招生息以資調劑著照所請准其在於江寧江浦
二縣還款項下借撥銀一萬兩同各丁現繳銀一
萬兩由該道先行飭發寧國府泗州所屬各典領
運生息以紓丁困該督仍另飭司道議立章程同
捐種清冊俟捐項繳清後一併咨部備覈欽此

覆奏嚴禁書肆小本文策摺片

再¹臣承准軍機大臣字寄欽奉

上諭前據王雲錦奏請嚴禁書肆小本文策以防士
子懷挾之弊竝稱有文海文備名目茲據步軍統
領衙門奏查出文備八本又名歷科墨正內載四
書時文竝載有登科秘訣又文選五本係五經時
文文萃六本名新增五經文萃各分名目易經文
曰文蔚書經文曰文茂詩經文曰文葩春秋文曰
文苞禮記文曰文藁內附有新策一本五經文鈔
五本卽五經時文俱係刊本其字甚小其本三四

三
寸見方僉稱此書來自江南其板片自必在該省
書肆收存著陶澍嚴飭所屬查明此種板片務須
迅速銷燬淨盡以杜流弊而端士習等因欽此復
准禮部咨道光十一年十月二十四日奉

上諭軍機大臣會同禮部都察院議奏給事中王雲
錦條陳請禁書肆小本一摺此等不肖惡習朕亦
夙知若祇出示嚴禁令其自行銷燬仍屬有名無
實著各直省督撫順天府五城步軍統領明查暗
訪將書肆小本板片概行銷燬等因欽此均經恭
錄轉飭查辦去後嗣據江寧布政使趙盛奎詳

據上元江寧二縣查有王兆嘉等鋪刊賣文海墨正文備四書全文新增五經文萃策學新纂五經文選書板六副同未經賣完各書全數查繳由司銷燬此外各府州屬尙無販賣此項書籍板片竝據署蘇州布政使額騰伊詳稱飭據蘇松等五府州查明各屬境內書肆委無前項書籍板片亦無售賣情事均取具坊鋪人等切結詳請覆

奏前來臣查前項書籍板片旣據查明呈繳未賣各書亦經全數查獲由司銷燬取具切結自不

致有隱匿惟現屆場期誠恐不肖書坊復思刊
賣圖利而士子等或仍有懷挾徼倖之心除飭
省城各員認真訪查併出示曉諭嗣後如再有
前項情弊定卽嚴行懲治外仍咨會撫臣於士
子入闈時嚴行按檢以杜流弊而端士習謹附
片覆

奏伏乞

聖鑒謹

奏

道光十二年七月二十日附片覆

奏八月二十三日奉到

硃批不可奉文了事務須認真查辦懲一儆百漸清
其源方爲實心任事勉之欽此

江蘇裁汰文職閒員摺子

蘇撫會稿

奏爲遵

旨酌裁文職閒員據實覆

奏仰祈

聖鑒事竊准吏部咨開欽奉

上諭各直省督撫於所轄文職閒員如有可裁者酌量裁汰據實奏聞請旨用副朕愼簡官僚勤恤民隱至意等因欽此伏查江蘇省地方遼闊賦重政繁邇來生齒日多民事增劇原設道府丞倅州縣正印各官分任地方事宜凡徵收錢糧及審

辦命盜等案在在均關緊要各有專司實無閒冗可裁之缺教職雖僅司訓課而江蘇學額較廣啟迪是資亦難裁汰惟於佐雜各缺中逐加酌覈查得華亭縣主簿一缺僅管水利如遇挑河等事仍應移縣詳辦此外並無巡防分汛專責堪以裁汰該主簿所司水利事務應就近改歸該縣縣丞兼管又鎮江府照磨一缺祇有稽查渡江救生船隻別無專管事務亦屬可裁其所司稽查救生船事宜改歸鎮江府知事兼管又金壇縣湖溪司巡檢一缺該處居民甚少並

無衙門巡檢在縣城賃房居住殊無分防之實
又江寧府照磨一缺除差委外竝無專管事宜
又揚州府檢校一缺祇有稽查刑溝閘座督夫
啟閉事宜可以改歸揚州府經歷就近兼管此
外別無專司之事以上三缺亦可一併裁汰所
有各缺額設辦事書役汰令歸農一切文卷概
行移交改歸衙門管理所遺衙署及應繳

勅書印信等件俟奉准之日照例查辦至此外佐雜
各缺今昔繁簡時有不同仍當體察情形隨時
酌量辦理再現任華亭縣主簿黃榜業經請陞

婁縣縣丞所遺華亭縣主簿毋庸再行揀員請
補其現任鎮江府照磨余錫溥金壇縣胡溪司
巡檢陳皓江寧府照磨章春奎署揚州府檢校
林鳳喈均請照例掄用出省遇缺卽補據江蘇
藩臬各司會詳前來臣等往返札商意見相同
理合據實奏

聞請

旨俯准將華亭縣主簿鎮江府照磨金壇縣湖溪司
巡檢江寧府照磨揚州府檢校五缺裁汰以副
聖主慎簡官僚循名覈實至意所有酌裁閒員緣由

謹合詞恭摺具

奏伏乞

皇上聖鑒訓示謹

奏

道光十二年七月二十日會

奏八月二十日奉到

硃批另有旨欽此同日奉到八月初五日內閣奉

上諭陶澍等奏酌裁文職閒員一摺江蘇華亭縣主

簿一缺無巡防分汛專責著卽裁汰該主簿所司

水利事務著改歸該縣縣丞兼管鎮江府照磨一

缺無專管事務著卽裁汰其所司稽查渡江救生
船事宜著改歸鎮江府知事兼管金壇縣湖溪司
巡檢無分防之實江寧府照磨一缺無專管事宜
揚州府檢校一缺無專司之事所有稽查刑溝閘
座督夫啟閉事宜著改歸揚州府經歷兼管以上
三缺俱著一併裁汰其鎮江府照磨余錫溥金壇
縣湖溪司巡檢陳皓江寧府照磨章春奎署揚州
府檢校林鳳喈均著撤回畱於該省遇缺卽補該
部知道欽此

陞署知縣請暫緩送部摺片

再崇明縣縣丞姚儲前經臣陶澍會同陞任撫

臣程祖洛

奏准陞署崇明縣知縣竝經聲請俟辦賑事竣再行給咨赴部引

見在案茲賑務已竣應卽請咨赴部惟查該縣上年秋間海潮異漲川廬被淹潮退之後東坍西漲舊時圩岸形勢變遷避水各佃農陸續歸來見地畝改變彼此爭執控案繁多本年適屆大丈之期正宜澈底丈清以杜影射而絕爭訟該員

姚儲現辦勘丈事宜似未便遽易生手據藩司
詳請暫緩引

見等情前來臣等謹循例附片奏
聞伏乞

聖鑒謹

奏

道光十二年七月二十日會

奏八月二十日奉到

硃批依議該部知道欽此

安徽裁汰閒員摺子

安徽撫
會稿

奏爲遵

旨裁汰通判縣丞各缺恭摺

奏祈

聖鑒事竊

臣等接准吏部咨開內閣奉

上諭國家設官分職原以保乂民生必使閭閻獲益
方足收指臂之效若令冗員濫竽充數其本任既
無事可辦而各員官廨一切公用不能盡出已資
勢必取之民間是多設一官百姓反多受一官之
累著各直省督撫悉心覈議於所轄文職閒員如

有可裁者酌量裁汰據實奏聞請旨用副朕愼簡
官僚勤恤民隱至意等因欽此臣等隨與藩臬兩
司悉心酌議查安徽省濱江阻淮幅輳遼闊撫
馭巡防均關緊要原設道府直隸州丞倅州縣
統轄分管各有專司其教佐各員均有本任應
辦事件未便輕議裁汰惟查有徽州府通判係
屬簡缺該員僅司休寧黟縣婺源祁門四縣緝
捕竝無監兌督運之責該府尙有同知一員事
務亦簡若將該四縣捕務歸併同知兼管可期
無誤又蕪湖縣縣丞一缺該縣雖地處江濱時

須稽察巡查第督捕事宜現有同駐縣城之太平府同知專司其事該縣丞本任無事可辦頗屬閒冗以上二缺應請裁汰如蒙

俞允卽將候補知州借補徽州府通判任壽世蕪湖縣縣丞林均二員撤回畱於皖省遇缺卽補此等裁汰人員本係實任其未補缺以前凡遇委署別缺准其接算俸次以示公允至徽州府通判原設步快八名卽歸併該府同知衙門差遣其餘門子皂隸等役同蕪湖縣縣丞額設門子皂役概行裁除所有編徵廉俸役食解司報撥

充餉裁遣衙署估變充公除未盡事宜咨部覈辦外據安徽藩臬兩司暨該管巡道會詳請奏前來臣等往返札商意見相同謹合詞恭摺具奏伏乞

皇上聖鑒訓示謹

奏

道光十二年八月初一日具

奏九月初五日奉到

硃批另有旨欽此同日奉到八月十七日內閣奉上諭陶澍等奏遵旨酌裁閒員一摺安徽徽州府通

判一缺竝無監兌督運之責著卽裁汰其所司休
寧黟縣婺源祁門四縣緝捕事務著歸併該府同
知兼管蕪湖縣縣丞一缺本任無事可辦實屬閒
冗著卽裁汰所有候補知州借補徽州府通判任
壽世蕪湖縣縣丞林均俱著撤回畱於該省遇缺
卽補竝准其接算俸次餘著照所議辦理該部知
道欽此

請將延玩知縣得賄典史革職提審摺子

安撫會稿

奏爲特叅江船盜賣引鹽捏報滄消延不稟辦及署內丁役索詐銀兩之署任知縣與得賄之代理典史請

旨一併革職提審究辦以肅

功令仰祈

聖鑒事竊照淮鹽運行各省每有盜賣劫搶捏報滄消之事皆因鹽船經歷長江及行銷各地方不肯認真查辦甚至勒索分肥以致舵水廝役各項人等肆無忌憚屢釀事端疊經

臣

等嚴飭沿

江州縣隨時催趲稽查並委員梭織催巡以期整飭詎有署銅陵縣知縣候補通判胡邦勸者前於三月內據報江船戶劉永泰裝運商人鄒德興西鹽六百引在該縣荷葉洲地方泔消臣

陶澍以情節可疑批飭將全案人証解交鹽運司審辦藐不稟覆延今四月之久未據報解密訪得船戶劉永泰全載盜賣串同該縣書役分贓捏報泔消該署縣胡邦勸難免徇庇知情又池州府口岸因舊商消退無鹽到岸經鹽運司詳請暫辦官鹽接濟遴委候補批驗大使許學

呂運鹽至銅陵縣設店銷售先有巡江委員候
補運判許惇詩字備孫萬清於該縣大通鎮地
方挈獲售私水手蔣廣清等四名私鹽七包交
大通鎮巡檢解縣收審旋被聚衆多人於巡檢
衙門將人鹽搶去署縣胡邦黼並不追踪查拏
迨許學呂委運官鹽到店時復於縣城西門大
街挈獲鹽犯羅能泰一名私鹽六包送縣審究
卽有夥黨多人闖至官店硬索釋犯時該署縣
因事赴府該汛把總饒名貴亦因領餉赴省無
人彈壓該縣門丁童升卽乘機索費銀五十兩

經開設錢店之監生寧玉桂過付並索委員出
具釋犯移文將鹽犯釋放匪黨始行散去官店
未被搶毀當據委員許學呂稟經署鹽運司俞
德淵轉稟前來臣陶澍接閱之下不勝駭異當
卽飛咨臣鄧廷楨將該署縣胡邦勸撤任一面
委員鎖提門丁童升過付監生寧玉桂到江臣
陶澍卽日親審已據供認向委員索賍代理典
史漆文瀾亦有分肥臣等查該署縣胡邦勸於
船戶劉永泰全載盜賣賄串書役捏報淦消延
不遵劄解審顯有知情庇縱情事其境內私鹽

充斥經委員獲送該署縣亦竟毫無覺察任令
脫逃迨至匪徒鬪鬧官店該縣門丁復敢向官
運委員索詐得賍典史於中分肥種種膽玩殊
出情理之外若不執法嚴懲何以肅江路而整
頽風據該管司道等揭報前來相應據實叅

奏請

旨將署銅陵縣事候補通判胡邦黼代理典史漆文
瀾一併革職飭調來江由臣陶澍嚴審究辦俾
資整頓除飭查明胡邦黼經手倉庫錢糧有無
未清另辦外爲此恭摺會

奏伏乞

皇上聖鑒訓示謹

奏

道光十二年八月初九日具

奏九月十四日奉到

硃批必須嚴行審訊斷不准稍有不實不盡之處另有旨諭欽此同日奉到八月二十五日內閣奉

上諭陶澍等奏江船盜賣引鹽捏報渰消請將知縣典史革職究審一招此案著安徽銅陵縣事候補通判胡邦黼於船戶劉永泰裝運引鹽全載盜賣

賄串書役捏報泮消延不解審其境內私鹽充斥
經委員挈獲各犯解縣收審亦竟毫無覺察任令
脫逃迨至匪徒聚衆鬧官店該縣門丁童升復
敢向官運委員索詐得賍該署縣種種膽玩殊出
情理之外代理典史漆文瀾現經供認分肥該署
縣亦難保無知情庇縱及得賄等弊必須嚴行審
訊胡邦黼漆文瀾著一併革職交該督親提嚴審
斷不准稍有不實不盡之處凜之愼之欽此

洪湖水勢蘇松等屬禾苗情形摺片

再本年淮水來源甚旺洪澤湖水截至七月二十五日止長存二丈零九寸拍岸盈堤甚形浩
瀚當經河臣啟放臨湖各壩並接啟車南中新
昭關等壩以資宣洩臣因兼署安徽學政適值
緣遣期迫不克分身前往迭飭該管道將廳營
察看水勢相機次第辦理河臣駐劄山盱督率
修守已於二十七日起至八月初二日止共已
消落七寸臨湖堤堰廂埽拋石悉臻穩固下河
各屬中稻大半收割晚禾雖尚未刈經地方官

預期示諭設法防守趕緊搶穫不致盡遭淹浸
江寧及蘇松等屬因六七月間雨澤稀少田畝
受旱農民望澤甚殷省城及各屬設壇祈禱於
八月初一二四五等日甘霖大沛起枯蘇槁禾
苗皆勃然興發日內雨霽更形暢茂秋成不致
失望合併附片具陳伏乞

聖鑒謹

奏

道光十二年八月初九日附

奏九月十四日奉到

殊批覽奏欣慰欽此